

Galatia

O KA EPISETOLE

- ¹ O PAULO, he lunaolelo, aole na kanaka mai, aole hoi ma ko kanaka, aka, ma o Iesu Kristo la, a ma ke Akua ka Makua nana ia i hoala'e mai ka make mai;
- ² O ka poe hoahanau no hoi me au, na na eklesia o Galatia:
- ³ E alohaia oukou, e maluhia hoi i ke Akua ka Makua, a i ko kakou Haku ia Iesu Kristo,
- ⁴ Nana i haawi mai ia ia iho no ko kakou hala, i hoopakele ae oia ia kakou i keia ao ino nei, e like me ka makemake o ke Akua, ko kakou Makua;
- ⁵ Oia ka hoonani mau loa ia'ku Amene.
- ⁶ Ua kahaha iho no wau i ka emoole o ko oukou haalele ana mai i ka mea i kono aku ia oukou iloko o ka euanelio a Kristo, a lilo i ka euanelio okoa:
- ⁷ Aole hoi ho euanelio okoa ia; aka, ke hoohihia nei kekahi poe ia oukou, me ka mauao e hookahuli i ka euanelio a Kristo.
- ⁸ Ina paha o makou, a he anela paha mai ka lani mai, e hai aku i ka euanelio i ku e i ka makou i hai aku ai ia oukou, e hoomainoinoia oia.
- ⁹ Me ka makou i olelo ai mamua, pela hoi au e olelo hou aku nei, a i hai aku kekahi ia oukou i ka olelo ku e i ka mea a oukou i loaa'i, e hoomainoinoia oia.
- ¹⁰ Ke hoolaulea nei anei au i kanaka, a i ke Akua anei? Ke imi nei anei hoi au e hoolealea i

kanaka? no ka mea, a i hoolealea aku au i kanaka, aole au he kauwa na Kristo.

- 11 Ke hoike aku nei au ia oukou, e na hoahanau, o ka euanelio a'u i hai aku ai, aole ia ma ka ke kanaka.
- 12 No ka mea, aole i loaa ia'u ia na ke kanaka mai, aole hoi au i aoia mai, aka, ma ka hoikeia mai no e Iesu Kristo.
- 13 Ua lohe oukou i kuu noho ana mamua ma ko ka Iudaio manao, he nui loa kuu hoomaaau ana'ku i ka ekalesia o ke Akua, me ka luku aku.
- 14 Ua oi aku au ma ko ka Iudaio manao, mamua o ka nui o ka poe hoahanauna o'u, a he nui loa ko'u ikaika ma na mooolelo a o'u mau kupuna.
- 15 I ka manawa i manao ai ke Akua nana au i hookaawale ae mai ka opu mai o ko'u makuwahine, a koho mai la ia'u ma kona lokomaikai,
- 16 E hoike mai i kana Keiki ia'u, i hai aku ai au ia ia i na kanaka e; wikiwiki iho la au, aole au i kuka me ka mea io a me ka mea koko;
- 17 Aole hoi au i pii aku i Ierusalema, i ka poe lunaolelo mamua o'u: aka, hele aku la au i Arabia, a hoi hou mai la i Damaseko.
- 18 A hala na makahiki ekolu, pii aku la au i Ierusalema e ike ia Petero a noho pu iho la au me ia i na la he umikumamalima.
- 19 O Iakobo hoi ka hoahanau o ka Haku ka'u i ike, aole ka lunaolelo e ae.
- 20 Aia hoi, imua o ke Akua, aole o'u hoopunipuni i na mea a'u e palapala aku nei ia oukou.

- ²¹ Ma ia hope mai, hele aku la au i na moku o Suria a me Kilikia;
- ²² A ua ike maka ole ia au e na ekalesia o Kristo ma Iudea.
- ²³ He lohe wale no ko lakou, O ka mea nana kakou i hoomaaui mai mamua, i neia manawa ke hai aku la ia i ka manao oiaio ana i hoino ai mamua.
- ²⁴ A hoonani aku la lakou i ke Akua no'u.

2

- ¹ A HALA na makahiki he umikumamaha, pii hou aku la au i Ierusalema, me Barenaba, a lawe pu aku no hoi ia Tito.
- ² Pii aku la au no ka hoikeia mai, a hoakaka aku la au ia lakou i ka enanelio a'u i hai aku ai i ko na aina e; aka, hoakaka malu aku la au i ka poe i manao maikai ia'e, malia o holo hewa paha uanei au, a ua holo hewa paha mamua.
- ³ Aka, o Tito ka Helene i noho pu me au, aole ia i lilo i ke koiia mai e okipoepoeia;
- ⁴ No ka poe hoahanau hoopunipuni i hookipa malu ia, ka i komo malu mai iloko e hoomakakiu mai i ko kakou luhi ole iloko o Kristo Iesu, i hooluhi mai ai lakou ia kakou.
- ⁵ Aole makou i hoolohe aku ia lakou me ka hoopili aku i hookahi hora; i mau ai ka oiaio o ka euanelio me oukou.
- ⁶ Aka, o ka poe i manao maikai ia, he oia paha, he mea ole ia ia'u; aole ke Akua i manao mai i ko ke kanaka kino. No ka mea, aohe mea hou a ka poe i manao maikai ia i haawi mai ai ia'u.

- ⁷ Aka, a ike iho la lakou, ua haawiia mai ia'u ka euanelio no ka poe i okipoepoe ole ia, e like me ia i haawiia mai ia Petero no ka poe i okipoepoeia;
- ⁸ (No ka mea, o ka mea nana i hooikaika mai ia Petero ma ka oihana lunaolelo no ka poe i okipoepoeia, oia ka i hooikaika mai ia'u no na kanaka e;)
- ⁹ A ike mai la Iakobo me Kepa a me Ioane i manaoia he mau Kia, i ka maikai i haawiia mai ia'u, haawi mai la lakou ia maua me Barenaba i na lima akau e hoolauna pu ai; i hele maua i ko na aina e, a o lakou i ka poe okipoepoeia.
- ¹⁰ I manao hoi maua i ka poe ilihune, oia hoi ka'u i manao nui ai e hana.
- ¹¹ A hele mai la Petero i Anetioka, ku e aku la au ia ia imua o kona alo, no ka mea, ua hewa ia.
- ¹² No ka mea, mamua o ka hiki ana mai o kekahi poe mai o Iakobo mai, ua ai pu iho la ia me ko na aina e; a hiki mai la lakou, hookaaawale ae la oia ia ia iho, e makau ana i ka poe i okipoepoeia.
- ¹³ A hoomahui pu aku la ka poe Iudaio e ae me ia; a lilo aku la o Barenaba mamuli o ko lakou hookamaui ana.
- ¹⁴ A ike aku la au, aole i ku pono ko lakou hele ana ma ka oiaio o ka euanelio, i aku la au ia Petero imua o lakou a pau, Ina o oe he Iudaio e noho like ana me ko na aina e, aole me ka poe Iudaio, pehea la kau e koi aku nei i ko na aina e e noho like me ko ka Iudaio?

- 15 O kakou na Iudaio maoli, aole na lawehala o ko na aina e,
- 16 Ke ike nei kakou, aole e hoaponoia ke kanaka ma na hana o ke kanawai, aka, ma ka manaoio ia Iesu Kristo; o kakou hoi kekahī i manaoio ia Iesu Kristo, i hoaponoia mai kakou ma ka manaoio ia Kristo, aole ma na hana o ke kanawai: no ka mea, aole e hoaponoia mai kekahī kanaka ma na hana o ke kanawai.
- 17 Ina paha e imi kakou e hoaponoia mai ma o Kristo la, a ikeā mai kakou he poe hewa, ke kumu anei o Kristo no ka hewa? Aole loa.
- 18 No ka mea, a i kukulu hou au i na mea a'u i wawahi ai, ua hoolilo iho la au ia'u iho i lawehala.
- 19 A owau nei ma ke kanawai, ua make i ke kanawai, i ola aku ai au i ke Akua.
- 20 Ua kau pu ia'ku au me Kristo ma ke kea: ua ola no hoi au, aole nae owau iho, aka, e ola ana o Kristo iloko o'u: a o ke ola e ola nei au iloko o ke kino, e ola'na au ma ka manaoio aku i Ke Keiki a ke Akua, nana au i aloha mai, a haawi mai la ia ia iho no'u.
- 21 Aole au e hoolilo i ka lokomaikai o ke Akua i mea ole; no ka mea, ina ma ke kanawai ka pono, ina ua ano ole ko Kristo make ana.

3

- ¹ E NA Galatia naaupo, nawai oukou i hoowale-wale mai i hoo lohe ole ai oukou i ka oiaio, imua o ko oukou maka ua waihoia o Iesu Kristo i kaulia ma ke kea iwaena o oukou?
- ² Eia wale no ko'u makemake e hoikeia mai e oukou; Ma na hana o ke kanawai anei i

loaa'i ia oukou ka Uhane, a ma ka hoolohe
aku o ka mauaoio anei?

- 3** Pela anei ko oukou naupo? i hoomaka iho ai
oukou ma ko ka Uhane, a ke hooki nei anei
oukou ma ko ke kino?
- 4** Ua make hewa anei kela mau mea pilikia i hiki
mai ai io oukou la? ina pela ua make hewa
paha.
- 5** No ia hoi, o ka mea i haawi mai i ka Uhane
no oukou, a hana mai hoi i na hana mana
iwaena o oukou, ma na hana o ke kanawai
anei ia, a ma ka hoolohe ana o ka manaoio
anei?
- 6** E like me Aberahama i manaoio ai i ke Akua, a na
hooliloia'e ia i pono nona.
- 7** No ia mea, e ike oukou, o ka poe ma ka manaoio,
o lakou ka poe keiki na Aberahama.
- 8** Ike e iho la ka palapala hemolele, e hoopono ana
ke Akua i na lahuikanaka ma ka manaoio,
hai e aku la ia mamua i ka euanelio ia Aber-
ahama, Ma on aku la e hoopomaikaiia'i na
lahuikanaka a pau.
- 9** Nolaila hoi, o na mea ma ka manaoio, na hoop-
omaikai pu ia lakou me Aberahama ka mea
manaoio.
- 10** No ka mea, o ka poe a pau ma na hana o ke
kanawai, aia no lakou malalo o ka hoahe-
waia; penei i palapalaia'i, E hoahewaia'ku
na mea a pau i hoomau ole o hana i na
mea a pau i kakauia maloko o ka buke o ke
kanawai.
- 11** Aka, ua akaka keia, aole kekahi e hoaponoia
imua o ke Akua ma ke kanawai: no ka mea,
O ka mea i pono, e ola ia ma ka manaoio.

- ¹² A o ke kanawai, aole ia ma ka manaoio: aka, o ke kanaka e hana ana ia mau mea, e ola ia ilaila.
- ¹³ Ua hoola ae la o Kristo ia kakou mai ka hoahewaia e ke kanawai, i kona lilo ana i ka hoahewaia no kakou: no ka mea, na palapalaia, Ua hoahewaia na mea a pau i kauia maluna o ka laau:
- ¹⁴ I kau mai ai ka hoopomaikaiia o Aberahama maluna o ko na aina e ma o Iesu Kristo la: i loaa mai ai ia kakou ma ka manaoio ka mea i oleloia mai ka Uhane.
- ¹⁵ E na hoahanau, ke olelo aku nei au ma ka ke kanaka; Ina i hoopania ka berita a kanaka wale no, aole kekahi e hoole ia mea, aole hoi e hana hou.
- ¹⁶ A ua haiia mai no na olelo ia Aberahama a me kana mamo. Aole ia i olelo mai no na mamo he nui; aka, no ka mea hookahi, No kau mamo, oia hoi o Kristo.
- ¹⁷ O keia ka'u o olelo aku nei, o ka berita i hoopaa e ia mamua e ke Akua no Kristo, aole e hiki i ke kanawai i kania mahope mai o na haneri makahiki eha a me kanakolu ke hoole aku, i haule ai ka olelo.
- ¹⁸ A ina ma ke kanawai ka hooili ana, aole no ia ma ka olelo: aka, na ke Akua ia i haawi wale mai ia Aberahama ma ka olelo.
- ¹⁹ I me aha hoi ke kanawai? Ua kauia mai ia no na hala, a hiki mai ka mamo nona ka olelo; a na hoolahaia'e la ia e na anela ma ka lima o ka mea uwao.
- ²⁰ A o ka mea uwao, aole ia no ka mea hookahi; aka, o ke Akua, hookahi no ia.

- 21** Ua ku e no anei ke kanawai i na olelo a ke Akua?
 Aole loa: no ka mea, ina i haawia mai ke
 kanawai e hiki ia ia ke hoola, ina no ma ke
 kanawai ka pono.
- 22** Aka, ua papapau pu na mea a pau i ka palapala
 hemolele malalo o ka hewa, i haawiia mai
 ai ka olelo ma ka manaoio ia Iesu Kristo na
 ka poe manaoio aku.
- 23** A mamua o ka hiki ana mai o ka manaoio, ua
 hoopaaia kakou malalo o ke kanawai, ua
 pio hoi a hiki i ka manawa e hoakakaia mai
 ai ka manaoio.
- 24** Nolaila, ua lilo ae la ke kanawai i kumualakai no
 kakou io Kristo la, i hoaponoia mai ai kakou
 ma ka manaoio.
- 25** Aka, i ka hiki ana mai o ka manaoio, aole o noho
 hou kakou malalo o ke kumualakai.
- 26** No ka mea, he poe keiki oukou a pau na ke Akua
 ma ka manaoio ia Kristo Iesu.
- 27** No ka mea, o na mea a pau o oukou i hapetisoia
 iloko o Kristo, ua aahu iho oukou ia Kristo.
- 28** Aole he Iudaio, aole hoi he Helene, aole he mea
 paa, aole hoi he mea paa ole, aole he kane,
 aole hoi he wahine; no ka mea, hookahi no
 oukou a pau iloko o Kristo Iesu.
- 29** Ina paha no Kristo oukou, alaila he poe mamo
 oukou na Aberahama, a me na hooilina hoi
 mamuli o ka olelo hoopomaikai.

4

- 1** KE olelo aku nei hoi au, o ka hooilina i kona wa
 opiopio, aole he ano e kona i ko ke kauwa,
 aka, nona ka waiwai a pau;

- ² Aia no ia malalo o ua kumu a me na kahu, a hiki
i ka manawa i hoikeia mai ai e ka makua.
- ³ Pela no kakou i ko kakou wa kamalii, ua
hooluhia e na oihana mua o ke ao nei.
- ⁴ Aka, i ka hiki ana mai o ka manawa maopopo,
hoouna mai la ke Akua i kana Keiki, a ka
wahine i hanau ai, i hanau malalo o ko
kanawai.
- ⁵ E hoopakele ae i ka poe malalo o ke kanawai, i
hookamaia mai ai kakou he poe keiki.
- ⁶ No ka mea, no ko oukou keiki ana, ua hoouna mai
la ke Akua i ka Uhane o kana Keiki iloko o
ko oukou mau naau, e kahea ana, E Aba, ka
Makua.
- ⁷ No ia mea, aole he kauwa luhi oe ma ia hope aku,
aka, he keiki no; ina he keiki, he hooilina no
hoi na ke Akua ma o Kristo la.
- ⁸ Aka, i ka manawa i ike ole ai oukou i ke Akua,
hookauwa aku la oukou na na akua oiaio
ole.
- ⁹ Ano hoi, ua ike oukou i ke Akua, he oiaio ua
ikeia mai e ke Akua, pehe la hoi oukou i
huli hou aku ai i na oihana mua palupalu
ilihune, i na mea a oukou i makemake hou
ai e hookauwa aku na lakou?
- ¹⁰ Ke malama nei oukou i ua la, a me na mahina, i
na manawa a me na makahiki.
- ¹¹ Ua hopohopo wau ia oukou, o make hewa paha
kuu hooluhia ana no oukou.
- ¹² E na hoahanau, ke nonoi aku nei au ia oukou, i
like oukou me au, no ka mea, ua like hoi au
mo oukou: aole no oukou i hana ino iki mai
ia'u.

- 13 Ua ike no oukou me ka palupalu o ke kino i hai
aku ai au i ka euanelio ia oukou i kinohou.
- 14 Aole no oukou i hoowahawaha mai i ka ino o
kuu kino, aole hoi oukou i hoopailua mai;
aka, na hookipa mai no oukou ia'u me he
anela la no ke Akua, me Kristo Iesu hoi.
- 15 Heaha la hoi ko oukou pomaikai ana? No ka
mea, ke hoike maka aku nei au no oukou,
ina he mea hiki ia, ina ua poalo ae oukou i
ko oukou mau maka a haawi mai ia'u.
- 16 Ua lilo anei au i enemi no oukou, i kuu hai
ana'ku i ka oiaio ia oukou?
- 17 Ua hu mai ko lakou aloha ia oukou, aole nae ma
ka pono: ke ake nei lakou e hookaawalo ia
oukou, i hu mai ko oukou aloha ia lakou.
- 18 Aka, he mea pono no ke hu ae a mau mai ke
aloha i ka mea maikai, aole i ka wa wale no
e noho ai au me oukou.
- 19 E kuu mau keiki liilii, ka poe a'u e haakohi nei e
hoohanau hou aku, a loaa mai o Kristo iloko
o oukou,
- 20 Ke ake nei au e ike ia oukou i neia manawa, a e
hoololi ae i kuu leo; no ka mea, ke haohao
nui nei au ia oukou.
- 21 E hai mai oukou ia'u, e ka poe i makemake e
noho malalo o ke kanawai, aole anei oukou
i lohe i ke kanawai?
- 22 No ka mea, ua palapalaia, Elua a Aberahama
keikikane; hookahi na ke kauwawahine,
hookahi hoi na ka hakuwawahine.
- 23 O ka mea na ke kauwawahine, ua hanau
ia ma ko ke kino; aka, o ka mea na ka
hakuwawahine, ma ka olelo hoopomaikai mai
oia.

- ²⁴ O keia mau mea, he hoailona ia; o laua no na kauoha elua; o kekahi nae no ke kuahiwī no Sinai mai, e hanau ana i ua keiki kauwa, oia o Hagara.
- ²⁵ No ka mea, o ua Hagara la oia ke kuahiwī o Sinai i Arabia; ua like hoi ia me Ierusalemā i neia manawa, a e hooluhi ana oia me kana poe keiki.
- ²⁶ Aka, o ka Ierusalemā maluna ka hakuwahine, oia ka makuwahine o kakou a pau.
- ²⁷ No ka mea, ua palapalaia, E olioli oe, e ka mea pa, i hanau ole i keiki; e poha aku me ka hea nui, e ka mea i hanau keiki ole; no ka mea, he nui na keiki a ka mea i haaleleia, he hapa ka ka mea kane.
- ²⁸ E na hoahanau, he poe keiki no hoi kakou ma ka olelo hoopomaikai mai e like me Isaaka.
- ²⁹ E like mamua, hoomaaū aku la ka mea i hanau ma ke kino i ka mea i hanau ma ka Uhane, pela no hoi i neia manawa.
- ³⁰ Aka, heaha ka ka palapala hemolele i i mai ai? E hookuke aku oe i ua kauwawahine la a me kana keiki; no ka mea, aole e hooili pu ia'ku ka waiwai i ke keiki a ke kauwawahine me ke keiki a ka hakuwahine.
- ³¹ Nolaila, e na hoahanau, aole he poe keiki kakou na ke kauwawahine, na ka hakuwahine no.

5

- ¹ NO ia mea, e kupaa oukou iloko a ke ola a Kristo i hoola mai ai ia kakou, aole hoi e paa hou oukou malalo o ka auamo hooluhi.

- ² Eia hoi, wau o Paulo ke i aku nei ia oukou; a i okipoepoeia oukou, aole oukou e pono ia Kristo.
- ³ Ke hoike hou aku nei au i kela mea i keia mea i okipoepoeia, he aie kana e malama aku ai i ke kanawai a pau.
- ⁴ Oukou ka poe e aponoia ma ke kanawai, ua hookaawaleia oukou mai o Kristo aku la; ua haule iho oukou mai ka lokomaikai aku.
- ⁵ Aka, ma ka Uhane makou e kali nei i ka pono e lana ai ka naau ma ka manaoio.
- ⁶ No ka mea, iloko o Kristo Iesu, aole ke okipoepoe ka mea e pono ai, aole hoi ke okipoepoe ole; aka, o ka manaoio e hana ana ma ke aloha.
- ⁷ Ua holo pono oukou; nawai la oukou i keakea, i hoolohe ole ai oukou i ka oiaio?
- ⁸ O ka mea nana oukou i kahea aku, aole nona mai ia manao.
- ⁹ O kahi mea hu he uuku, ke hoohu ae la ia i ka popopalaoa a pau.
- ¹⁰ Ua maopopo kuu manao ia oukou ma ka Haku, aole oukou e manao ma ka mea ku e: aka, o ka mea nana oukou i hoopilikia aku, e ukuia'na oia.
- ¹¹ E na hoahanau, ina paha wau e kauoha aku i ko okipoepoe, no ke aha la wau e hoomaauiia mai nei? Ua pau nae ka hihia o ke kea ilaila.
- ¹² He pono i kuu manao i hookiia'e ka poe hookahuli ia oukou.
- ¹³ E na hoahanau, ua heaia oukou ma ka luhi ole; mai hoolilo nae oukou i ua luhi ole la i mea no ke kino, aka, ma ke aloha e malama aku kekahia i kekahia.

- ¹⁴No ka mea, ua malamaia ke kanawai a pau make kauoha hookahi, oia hoi keia, E aloha aku oe i kou hoalauna e like me oe iho.
- ¹⁵Aka, ina e akiaki oukou me ka hoopau i kekahi i kekahi; e ao o pau auanei oukou i kekahi i kekahi
- ¹⁶Ke olelo aku nei hoi au, e haele oukou ma ko ka Uhane, aole e hooko oukou i ke kuko hewa o ke kino.
- ¹⁷No ka mea, ua ku e ke kuko o ke kino i ko ka Uhane, a o ko ku Uhane i ko ke kino; a ua ku e ia mau mea i kekahi i kekahi, i hiki ole ai ia oukou ke hana i na mea n oukou i makemake ai.
- ¹⁸A i alakaiia oukou e ka Uhaue, aole no oukou malalo o ke kanawai.
- ¹⁹A ua akaka ae la ua hana o ke kino; oia ka moe kolohe, ka hookamakama, ka hoohaumia, ka makaleho,
- ²⁰Ka hoomana kii, ka hoopiopio, ka inaina, ka hakaka, ka ukiuki, ka huhu, ka hoopaapaa, ka mokuahana, ka manao ku e,
- ²¹Ka huahuwa, ka pepehi kanaka, ka ona ana, ka uhauha ana, a me na mea like; na mea a'u e hai e aku nei ia oukou, me a'u i hai e aku ai mamua, o ka poe e hana i ua mau mea la, aole e hooiliia no lakou ke aupuni o ke Akua.
- ²²Aka, o ka hua na ka Uhane, oia ke aloha, ka olioli, ke kuikahi, ke ahonui, ka lokomaikai, ka maikai, ka manaoio,
- ²³Ke akahai, ka pakiko; aohe kanawai papa mai ia mau mea.

²⁴ A o ka poe no Kristo, ua kau aku lakou i ko ke kino, me na manao hewa, a me na kuko hewa ma ke kea.

²⁵ A i noho kakou ma ko ka Uhane, e hele hoi kakou ma ko ka Uhane.

²⁶ Mai manao kiekie kakou, me ka hoonaukiuki aku i kekahī i kekahī, a me ka huahuwa i kekahī i kekahī.

6

¹ E NA hoahanau, a i loohia wale ke kanaka e kekahī hewa, na oukou ka poe ma ka Uhane, e hoihoi mai ia ia me ka naau aka-hai; a mo ka malama ia oe iho, o lilo hoi oe i ka hoowalewaleia.

² E hali kekahī o oukou i na mea kaumaha a kekahī, pela oukou e hooko ai i ke kanawai o Kristo.

³ No ka mea, ina paha e manao ana kekahī ia ia iho he mea nui oia, aole ka hoi, ina ua hoopunipuni oia ia ia iho.

⁴ Aka, e hoao iho kela mea keia mea i kana hana ana, alaila iloko wale iho no ona kona kaena ana, aole iloko o hai.

⁵ No ka mea, e halihali auanei kola mea keia mea i kona luhi iho.

⁶ O ka mea i aoia mai i ka olelo, e haawi aku oia i na mea maikai a pau na ka mea nana i ao mai.

⁷ Mai kuhi hewa oukou, aole ke Akua e hoomae-waewaia'ku; no ka mea, o ka ke kanaka i lulu, o kana hoi ia e ohi mai.

⁸ No ia mea, o ka mea e lulu ma kona kino iho, no ke kino ia e ohi auanei i ka make; aka, o ka

mea e lulu ma ka Uhane, no ka Uhane ia e
ohi auanei i ke ola mau loa.

⁹ Mai hoopaleha kakou i ka hana maikai; no ka
mea, i ka wa pono e ohi auanei kakou, ke
hoonawaliwali ole kakou.

¹⁰ Nolaila, e like me ko kakou manawa maopopo,
pela e hana maikai aku ai kakou i na mea a
pau, oiaio hoi i ka poe ohana manaoio.

¹¹ E ike oukou i ka nui o ka palapala a'u e kakau
aku nei na oukou me ko'u lima iho.

¹² O ka poe a pau e ake e hoomaikai i ko ke kino,
o lakou ke koi aku ia oukou e okipoepoeia; i
mea wale no e hoomaau ole ia mai ai lakou
no ke kea o Kristo.

¹³ No ka mea, o ka poe i okipoepoeia, aole hoi lakou
i malama i ke kanawai; ke ake nei lakou e
okipoepoeia oukou, i mea e kaena aku ai
lakou i ko oukou kino.

¹⁴ Aole loa a'u mea e ae e kaena aku ai, o ke kea
wale no o ko kakou Haku o Iesu Kristo, nona
i kaulia'i ma ko kea ko ke ao nei ia'u, a owau
hoi i ko ke ao nei.

¹⁵ No ka mea, iloko o Kristo Iesu aole ke okipoe-
poeia ka mea e pono ai, aole hoi ke okipoe-
poe ole ia, aka, o ka mea i haua hou ia.

¹⁶ A o ka poe a pau e hele ma keia manao, maluna
o lakou ka mala a me ke aloha, a maluna hoi
o ka poo Israela o ke Akua.

¹⁷ Ma ia hope aku, mai hooluhi mai kekahia ia'u; no
ka mea, ke halihali nei au ma ko'u kino i na
hoailona o ka Haku o Iesu.

18 E na hoahanau, o ka lokomaikai o ko kakou
Haku o Iesu Kristo mo ko oukou uhane.
Amene.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 11 Nov 2022 from source files
dated 9 Oct 2020

4fde4536-9f74-574b-8404-d9ec34a30cbb